

егемен

Археолог

Атбегілік өнер өрнектері



Жұтынған жүйрік мініп, жұлқынған қыранды қолға қондырған бабалар үлгісін жандандыру жолында осы күндері ұмтылыс та, талпыныс та бар. Қазақ дәстүрін жаңғыртуды ниет еткен белді де белгілі азаматтар біраз иғлікті істің басын қайырып келеді. Дегенмен, кейде сөзде болғанмен істе іркіліп, бітпейтін түрлі сылтауларды көлденендетіп ертеңгі күннің еншісіне ысырып жатқан жұмыстар да жоқ емес. Қалай десек те ұлтқа қажет күндылықты көмбеге таяп қалған көне көздер барда жаңғыртып, уақыт талабына қарай жаңартып бітірмесек, жаһандану заманында өркениет өрісі бізде емес, өзгелерде деген кейбір жастардың оны қажетсіне қоюы екіталай. Осындай күмәнді сұрақ кейде кеңірдекке кептелетіні де рас. Осы ұлт жәдігерлерінің түптің-түбінде қажет болатынын анау кеңес дәуірінде күн кешкен, бірақ уақыттан оза туып, дәуірдің бүгінін емес, келешегіне көз тіккен санлақ академик Әлкей Марғұлан тарихтың терен қатпарын тас пен тауды кезе жүріп, халық шежіресі іспеттес фольклорымызды талдай отырып, арасында саятшылығымызды да түгендеген екен.

Соның бір дәлеліндей, 2014 жылдың Отанымыздың Ұлттық спорт түрлері қауымдастырының бастамасымен шыққан «Саят құстары» деген келісті кітабы қолға тиді. Сол жауғар дүниенің алғы сөзін профессор Тұрсын Жұртбай жазып, жауапты редакторлықты Бекен Қайратұлы атқарғаны бар. Енді міне, әдемі безендірілген, «Желіде құлын жусаса, Кермеде тұлпар бусанса... Ор қояндай қабақты, Қиған қамыс құлакты, Сарымсақтай азулы, Саптыаяқтай ерінді, Қидасын кәрі жілікті, Омырауы есіктей, Ойынды еті бесіктей, Табаны жалпақ тарланды, Таңбалап мінер ме екенбіз», деп Ақтамберді жырау жырлағандай, қазақтың атбегілігі туралы әдістемелік окулық кітабы да жарық көріп отыр.

Авторы – Бекен Қайратұлы. Алғы сөзін белгілі азамат Қайрат Сатыбалдыұлы жазып, жинақтың құрылымына тоқталып, сонында: «Бұл кітаптың басты ерекшелігі – ғылыми-теориялық жалаң баяндау емес, тәжірибелі оқу құралы ретінде жазылуында. Атбегілік өнермен айналысуға ниет еткен азаматтар үшін пайдалы боларына сенімдіміз», деп түйін жасайды. Ұлттың тек тамырын, дәстүр-салтын бір кісідей білетін, сөз төркінін алыстан ұғатын Бекен Қайратұлы кітаптың алғашқы бөлімінде жылқының сыртқы келбеті, ішкі ағзаларын, жүріс-тұрысын баян етсе, екінші бөлімінде жылқы мүшелеріне жеке-жеке тоқталады. Жүйрікті тану тәсілдері, бұл жолдағы қазақ сыншыларының көрегендігі тайға таңба басқандай көрсетіледі. Арғы-бергі дәуірлердегі қазақ сыншыларын түгендеп, Толыбай мен Күреңбайды, Абайды, өзге де көнілі сараларды тілге тиек етіп, олардың асыл қасиеттерін кейінгіге үлгі етеді. Қазақ сыншыларының көрегендігіне көзінді жеткізеді. Ал үшінші бөлім, жүйрік пен жорғаны баптауға арналса, төртінші бөлім жылқының түсі мен ен-таңбасына, жабдықтарына,

жайылымына, жасын анықтауға, қазақ жеріндегі жылқы түрлеріне, жылқы өнімдеріне тереңдеп барып, жүйелі сөз қозғайды. Соңғы бөлімде жылқы аурулары, жылқыға қатысты бұрын белгісіз болып келген тың сөздер, жаңа терминдер, өзге де такырыптар желі тартады. Болашакта осы құнды атаулар мен терминдерді айналысқа қоссақ, қазақ сөзінің бағы ашылып, атбетілік өнердің сөз әлеміндегі аясы кеңі түседі деген үміт зор.

Бұл әдістемелік еңбектің тағы бір ерекшелігі, төрткіл дүниедегі жылқы атаулының саны, оның қай елдерде (АҚШ-та 10 миллионнан аса, Қытайда 7 миллионға таяу, Мексикада 6,5 миллион... Қазақстанда 1,5 миллион) молынан екені де көрсетілген. Сонымен қатар, атбетілікке қатысты қазақтың аталы сөздері батырлар жырындағы келісті өлең өрнектерін, сол секілді «Сен маған мініп жүрген атынды көрсет, мен сенің кім екенінді айтып берейін», «Жылқыны алтын сарайда ұстағаннан жүйрік болмайды, ол нағыз атбетінің баптауы арқасында тұлпар болады», деп келетін ағылшын, дат мәтелдерін, «Ат үстінде туып қазақ сәбиі, Ат үстінде айтылады әлди... Ат қазақтың ауасы да даласы, Атсыз бір күн тұра алмайды баласы!», деп жырлаған поляк ақыны Г.Зелинскийдің дастанынан үзінділерді де беріп отырған. Автордың тағы бір табысы, бәрін өзім білем демей, дерек көздерін қайдан алғанын, авторлары кім екенін, қандай танымдық әдебиеттерді пайдаланғанын, тіпті, қарап шыққан әлеуметтік желілерді де көрсетіп отырған. Сонымен, ұлттық жауһарларымыз тағы бір еңбекпен, яғни атбетілік өнерді жан-жақты жазған толымды кітаппен толығып отыр.

Сұлеймен МӘМЕТ, «Егемен Қазақстан»